

Evening Dogri (NSD) Bulletin 04-12-2024

आकाशवाणी

खास-खास खबरां

1. प्रधानमंत्री नरेन्द्र मोदी होरें आखेआ ऐ जे ग्रामीण लोकें गी मान-सम्मान आह्ला जीवन उपलब्ध करोआना उंदी सरकार दी मुख प्राथमिकता ऐ। मोदी होरें 6एं दिनें दे ग्रामीण भारत महोत्सव दा भारत मंडपम च उद्घाटन कीता।
2. कृषि मंत्री शिवराज सिंह चौहान होरें आखेआ ऐ जे सरकार उत्पादक ते उपभोक्ता राज्यें बशकार मुल्ल दे फर्क गी दूर करने आस्तै ट्रांसपोर्ट ते भंडारण दी लागत आपूं झल्लोग।
3. केन्द्री गृह मंत्री अमित शाह होरें कम्मकाजी महिलाएं दे होस्टल सुषमा भवन दा उद्घाटन कीता। उनें आखेआ जे सरकारै उचित नीतिगत रूपरेखा दे कन्नै शैहरी विकास दी रपतार तेज कीती ऐ।
4. सूचना ते प्रसारण मंत्री अश्विनी वैष्णव होरें बच्चें गी आग्रह कीता ऐ जे ओह म्तेहानें दा बोझ लैने दे बजाए उंदे आस्तै जूनून पैदा करन।
5. विज्ञान ते टेक्नोलाजी मंत्री डॉ. जितेंद्र सिंह होरें आखेआ ऐ जे सरकार शोध ते विकास दे खेत्तर च महिला केंद्रित कार्यक्रमें गी तरजीह देआ करदी ऐ।
6. 38मीं राश्ट्री खेड्डें दी मशाल 'तेजस्विनी' अज्ज उत्तराखंड दे बागेश्वर पुज्जी।

<><><><><><>

PM-Gramin Mahotsav

प्रधानमंत्री नरेन्द्र मोदी होरें ग्राएं गी विकास ते मौके दे जीवंत केंद्रें च तब्दील करियै ग्रामीण भारत गी सशक्त बनाने दे सरकार दे नजरिये पर जोर दित्ता ऐ। प्रधानमंत्री होरें दस्सेआ जे 2014 कोला सरकार ग्राएं दे लोकें गी सम्मान जनक जीवन प्रदान करने दी प्राथमिकता दे कन्नै लगातार ग्रामीण भारत दी सेवा करा करदी ऐ। उनें अग्गे आखेआ जे सरकार नै हरेक ग्रां च बुनियादी सहूलतां जकीनी बनाने आस्तै इक मुहिम शुरू कीती ऐ। प्रधानमंत्री होरें 4 शा 9 जनवरी तगर नमीं दिल्ली दे भारत मंडपम च आयोजित कीते जा'रदे ग्रामीण भारत महोत्सव दा उद्घाटन करने दे परैंत सभा गी संबोधत करदे होई एह गल्ल आक्खी। इस महोत्सव दा विषय ऐ "विकसित भारत-2047 आस्तै इक सशक्त ग्रामीण भारत दा निर्माण" ते एहदा आदर्श वाक्य ऐ "गांव बढे तो देश बढे"। श्री मोदी होरें आखेआ जे जनजातीय इलाकें दे विकास लेई प्रधानमंत्री जनमन योजना दी शुरूआत कन्नै दहाकें थमां विकास शा वंचित खेत्तरें गी बरोबर दे अधिकार मिलै करदे न। उनें आखेआ जे पिच्छले 10एं ब'रें च उंदी सरकारै पिच्छली सरकारें दी केई गलतियें गी सुधारेआ ऐ। प्रधानमंत्री होरें आखेआ जे सरकार ग्रामीण विकास दे माध्यम कन्नै राष्ट्रीय विकास दे मंत्रर कन्नै अग्गे बधै करदी ऐ। उनें आखेआ जे इनें जतनें दे नतीजतन 25 करोड़ लोक गरीबी शा बाहर निकले न, जिंदे चा मते सारे ग्रामीण इलाकें थमां न। श्री मोदी होरें भारती स्टेट बैंक दे हालिया शोध दा बी उल्लेख कीता, जेहदे पता चलेआ ऐ जे भारत च ग्रामीण गरीबी 2012 च लगभग 26 प्रतिशत थमां घटियै 2024 च 5 प्रतिशत थमां बी घट्ट होई गई ऐ।

<><><><><><>

PM Chidambaram

प्रधानमंत्री नरेन्द्र मोदी होरें वरिष्ठ साईंसदान डॉक्टर राजगोपाल चिदम्बरम हुंदे काल पर सोग व्यक्त कीता ऐ। इक सोशल मीडिया पोस्ट च उनें आखेआ जे डॉ.

राजगोपाल चिदम्बरम होरें भारत दे परमाणु कार्यक्रम च प्रमुख भूमिका निभाई। श्री मोदी होरें भारत दी वैज्ञानिक ते रणनीतिक समर्थ गी मजबूत करने च उंदे जोगदान दी सराहना कीती। प्रधानमंत्री होरें इब्बी आखेआ जे समूलचा देश डॉ. राजगोपाल चिदम्बरम होरें'गी कृतज्ञता कन्नै चेतता रक्खोग ते उंदे जतन औने आहली पीढियें गी प्रेरित करदे रौहडन।

<><><><><><>

Shiv Raj Singh

कृषि ते करसान कल्याण मंत्री शिवराज सिंह चौहान होरें आखेआ ऐ जे सरकार उत्पादक ते उपभोक्ता राज्यें बशकार मुल्ल दे फर्क गी दूर करने आस्तै ट्रांसपोर्ट ते भंडारण दी लागत आपूं झल्लोग। श्री चौहान होरें अज्ज नमीं दिल्ली च राज्यें ते केंद्रशासित प्रदेशों दे कृषि मंत्रियें दे कन्नै समीक्षा बैठक दे दरान दस्सेआ जे इस ब'रे कृषि ते एह्दे'नै जुड़े दे खेत्तरें दी विकास दर 3 इशारिया 5 फीसद बशकार रौहने दी मेद ऐ। उनें आखेआ जे प्रधानमंत्री किसान सम्मान निधि दे तैहत 11 करोड़ करसानें गी 18 किशतें च तकरीबन 3 लक्ख 46 हजार करोड़ रुपें दी रकम बंड्डी जाई चुकी दी ऐ। श्री चौहान होरें आखेआ जे किसान क्रेडिट कार्ड पर घट्ट ब्याज पर दोआर दी बवस्था सने नेकां उपाऽ कीते गे न। उनें आखेआ जे कृषि दे खेत्तर च प्रगति होआ करदी ऐ ते उंदा मंत्रालय एह्दे आस्तै लगातार जतन करै करदा ऐ। उनें दस्सेआ जे रसैनी हैलें दे लगातार इस्तेमाल करी जिमीं गी होआ करदे नुकसान थमां बचने आस्तै कुदरी खेती आहले मिशन गी बढ़ावा देने दे मकसद कन्नै इक होर अभियान चलाया जा करदा ऐ।

<><><><><><>

HM Sushma Bhawan

केन्द्री गृह मंत्री अमित शाह होरें आखेआ ऐ जे सरकारै उचित नीतिगत रूपरेखा दे कन्नै शैहरी विकास दी रफ्तार तेज कीती ऐ। उनें नमीं दिल्ली दे लक्ष्मीबाई नगर च कम्मकाजी महिलाएं दे होस्टल सुषमा भवन दा उद्घाटन करदे होई एह

गल्ल आखी। उनें मोतीबाग च वर्चुअल ढंगै कन्नै मवेशिएं दे इलाज सरबंधी इक केन्द्र दा बी उदघाटन कीता। उनें साबका विदेश मंत्री सुरगवासी सुषमा स्वराज हुंदे महत्वपूर्ण जोगदानें गी चेतता करदे होई उनें गी पार्टी दे सब्बनें शा महान नेताएं चा इक्क करार दित्ता। श्री शाह होरें राष्ट्री स्मार्ट सिटी मिशन दे तैहत नेडे दे ग्राएं गी शैहरें च बदलने दा जिक्र कीता। सुरक्षा उपायें दे बारे च गृहमंत्री होरें दस्सेआ जे देशै दे बसनीकें दी सुरक्षा जकीनी बनाने लेई केई शैहरें च सी. सी.टी. कैमरें दे कन्नो-कन्नी संगठित कमान ते नियंत्रण केन्द्र बनाए गे न। उनें दस्सेआ जे भविक्ख च आर्टिफिशियल इंटेलीजेस दी मदाद कन्नै इनें सुरक्षा उपायें दा इस्तेमाल बक्ख-बक्ख उद्देश्यें आहली परियोजनाएं गितै कीता जाहग। श्री शाह होरें आखेआ जे मेट्रो रेल दा विस्तार, इलेक्ट्रिक गडिडएं दी शुरुआत ते स्वच्छ ऊर्जा लेई प्रधानमंत्री सूर्य घर योजना, शैहरी विकास नीति दे केन्द्र बिन्दु न। श्री शाह होरें दिल्ली दी आम आदमी पार्टी सरकार पर त्रिक्खा जबानी हमला करदे होई ओहदे पर दिल्ली गी बर्बाद करने दा आरोप लाया। उनें आम आदमी पार्टी दे संयोजक अरविंद केजरीवाल हुंदे पर आरोप लाया जे उनें मुख्मन्त्री दे ओहद्वे पर रौहदे होई अपनी कोठी पर आलीशान सुविधाएं लेई कथित तौर पर बड़ी भारी रकम खर्च कीती।



Vaishnav Exam Warrior

सूचना ते प्रसारण मंत्री अश्विनी वैष्णव होरें बच्चें गी आग्रह कीता ऐ जे ओह म्तेहानें दा बोझ लैने दे बजाए उंदे आस्तै जूनून पैदा करन। उनें अज्ज नमीं दिल्ली नगर पालिका परिषद दे एकजाम वारियर्स आर्ट फेस्टिवल च बच्चें दे कन्नै गल्लबात च आखेआ जे सिनेमा दे अभिनेता ते खड्ढारी इसकरियै खरा प्रदर्शन करदे न कीजे उंदे च अपने कम्मै प्रति जूनून होंदा ऐ। इस कार्यक्रम च बक्ख-बक्ख स्कूलें दे तकरीबन 5 जहार बच्चे हिस्सा लै करदे न। प्रधानमंत्री नरेन्द्र मोदी होरें इक वीडियो संदेश च आखेआ जे बच्चें पर बोझ म्तेहानें दा नेई सगुआं महत्वकांक्षाएं ते मेदें करी होंदा ऐ। उनें विद्यार्थियें गी आखेआ जे

उंदे कोल अग्गे बधने दे नकां मौके ते विकल्प मजूद न। इस मौके उप्पर सांसद बांसुरी स्वराज, नमीं दिल्ली नगर पालिका परिषद दे अध्यक्ष केशव चन्द्रा ते उपाध्यक्ष कुलजीत सिंह बी मजूद हे।

<><><><><><>

Dr. Jitendra Singh

विज्ञान ते टेक्नोलाजी मंत्री डॉ. जितेंद्र सिंह होरें आखेआ ऐ जे सरकार शोध ते विकास दे खेत्तर च महिला केंद्रित कार्यक्रमें गी तरजीह देआ करदी ऐ। डॉ० सिंह होरें नमीं दिल्ली च वैज्ञानिक ते औद्योगिक शोध सरबंधी विभाग – डीएसआईआर दे 40में स्थापना दिवस समारोह गी संबोधित करदे होई आखेआ जे डीएसआईआर दा गठन मुख् रूप कन्नै उद्योगें दे कन्नै शोध ते विकास दे तालमेल पर ध्यान केंद्रित करने लेई कीता गोआ हा। डीएसआईआर दा स्थापना दिवस बक्ख-बक्ख कार्यक्रमें दे माध्यम कन्नै औद्योगिक शोध ते नमिएं काह्डें गी अग्गे बधाने च एहदी भूमिका पर लोऽ पांदा ऐ। इंदे च शोध सरबंधी तंत्र गी मजबूत करने लेई इन-हाउस शोध ते विकास केंद्रें, वैज्ञानिक ते औद्योगिक शोध संगठनें ते सरकारी माली मदाद कन्नै चलने आहले इदारें गी मान्यता देना शामिल ऐ। डीएसआईआर दा मुख् कम्म, तकनीकी विकास बक्खी ध्यान केंद्रित करदे होई स्वदेशी औद्योगिक शोध गी बढ़ावा देना ऐ।

<><><><><><>

Giriraj Singh

केन्द्री कपड़ा मंत्री गिरिराज सिंह होरें अज्ज पच्छम बंगाल दे नदिया जिले दे फुलिया च हत्थखड्डिएं सरबंधी भारती तकनीकी संस्थान दे नमें बनाए गेदे भवन दा उद्घाटन कीता। उनें संस्थान दे अधिकारियें कन्नै बैठक कीती ते विद्यार्थिएं कन्ने गल्लबात बी कीती। श्री सिंह होरें 'एक पेड़ मां के नाम' पैहल दे तैहत इक बूहटा बी लाया। इस मौके उप्पर पच्छम बंगाल विधानसभा च विपक्ष दे नेता

Indian Sports

38मीं राश्ट्री खेड्ढें दी मशाल 'तेजस्विनी' अज्ज उत्तराखंड दे बागेश्वर पुज्जी। उत्थे जिला खेड्ढ अधिकारियें ते खेड्ढ प्रेमियें तेजस्विनी मशाल यात्रा दा भव्य स्वागत कीता। उत्तराखंड पैहली बारी राश्ट्री खेड्ढें दी मेजबानी करै करदा ऐ। उत्तराखंड दे मुख्मन्त्री पुष्कर सिंह धामी होरें पिच्छले म्हीने दी 26 तरीक गी हल्द्वानी थमां मशाल रैली गी झंडी दस्सी ही, जेहड़ी 13 जिलें दिएं 99 थाहरें दा दौरा करने परैन्त 25 जनवरी गी देहरादून पुज्जोग।

<><><><><><>

MP Union Carbide

मध्य प्रदेश दे मुख्मन्त्री डॉक्टर मोहन यादव हुंदे आश्वासनें दे बावजूद राज्य दे धार जिले दे पीथमपुर च यूनियन कार्बाइड दे कचरे गी फुक्कने दे खलाफ प्रदर्शन जारी ऐ। पीथमपुर औद्योगिक खेत्तर च अज्ज किश लोकें रामकी इनवायरो इन्डस्ट्रीज दे गेट पर जन्नी-बट्टे मारे। कचरे गी इत्थे गै फुक्केया जाना ऐ। उत्थे मजूद उप-तैहसीलदार अनीता बरेठा होरें भरोसा दोआया जे कचरे गी नां ते तोआरेआ गेआ ऐ ते नां गै इसी फुक्कने दी कोई तयारी कीती गई ऐ इसकरियै लोकें गी प्रशासन पर विश्वास रक्खना लोड्चदा।

<><><><><><>

Equador Emergency

इक्वाडोर दे राश्ट्रपति डेनियल नोबोआ होरें देशै च बधदी अशांति ते फौजी टकराव दे चलदे 7 प्रांतें ते 3 नगर पालिकाएं च 60 दिनें लेई एमरजेन्सी दा ऐलान कता ऐ। श्री नोबोआ होरें एमरजेन्सी दिएं मुख्म वजहें च बधदी अपराध दर ते संगठित थेहारबंद गुटें दी मजूदगी दा हवाला दित्ता ऐ। इक्वाडोर, जनवरी 2024 थमां गै, सरकार आसेआ आतंकवादी करार दित्ते गेदे संगठित अपराधी समूहें कन्नै फौजी संघर्ष दा सामना करै करदा ऐ।



Myanmar

म्यांमार दी फौजी सरकारै देशै दे स्वतंत्रता दिवस दे मौके उप्पर 180 विदेशियें सने तकरीबन 6 जहार कैदियें गी रिहा करने दा ऐलान कीता ऐ। फौज नै आखेआ ऐ जे उन्नै मनुक्खी ते दया दी बिनाह उप्पर इ'नें कैदिएं गी माफी देने दा हुक्म दित्ता ऐ। एहदे तैहत होरनें कैदियें दी सजा गी बी घट्ट करने दा फैसला लैता गोआ ऐ। म्यांमार दी फौज आसेआ कैद कीते गेदे लोकें च देशै दी साबका नेता ते नोबेल पुरस्कार विजेता आंग सान सू की बी शामिल न।



Trains delayed

देशै दे उत्तरी हिस्से च घने कोहरे करी केई ट्रेनें दी आओजाई प्रभावित होई ऐ। भारती रेलवे मूजब, दिल्ली औने आहली लगभग 40 ट्रेनां 5 घंटे तगर दे चिर कन्नै चलै करदिआं न। इंदे च कालिंदी एक्सप्रेस, रीवा एक्सप्रेस, महाबोधि एक्सप्रेस, कैफ़ियत एक्सप्रेस, यूपी संपर्क क्रांति, भोपाल एक्सप्रेस, हमसफर एक्सप्रेस ते सियालदह राजधानी एक्सप्रेस शामिल न। यात्रियें गी अपनी ट्रेन यात्रा लेई स्टेशन पर पुज्जने कोला पैहले ट्रेनें दी ताजा स्थिति दी जांच करने दी सलाह दित्ती गेई ऐ।



Weather

मौसम विभाग नै जम्मू-कश्मीर च 5 ते 6 जनवरी लेई मौसम सरबंधी येलो-अलर्ट आहली चेतावनी जारी करदे होई आखेआ ऐ जे इस दरान बक्ख-बक्ख थाहें पर भारी बरखा ते बर्फबारी होई सकदी ऐ। आकाशवाणी दे जम्मू संवाददाता मूजब, 4 थ्वां 6 जनवरी तगर जम्मू दे मैदानी इलाके च हल्की थ्वा दरमेयानें दर्जे दी बरखा पेई सकदी ऐ। त जम्मू कश्मीर दी मती सारी थाहरें पर बर्फबारी होई सकदी ऐ।

5 ते 6 जनवरी गी बर्फू दे लास तौदे सनें लास्स पस्सियां पेई सकदियां न जेदे करी ट्रैफिक पर असर पेई सकदा ऐ। तोआई एतिहासिक मुगल शिडक जेडी जम्मू खित्ते दे राजौरी ते पुछ जिले दी कश्मीर घाटी दे शौपियां जिले कन्ने जोडदी ऐ गड्डिएं दी आओ जाई लेई बंद ऐ। आकाशवाणी जम्मू संवाददाता दी रिपोर्ट मूजब शिडक पर तलैट होने करी एह शिडक गड्डिएं दी आओ जाई लेई बंद ऐ।

<><><><><><>

